

KOLOSIIYA

Warage O Ayeedek Pól Ol O Abaak Kolosiya

1 ¹ Aneeta Pól o keen toonnyai o Yesu Kiristo eo arɔɔŋi Jooi niini doon. ² Aneet been Timozi ween gɔtɔna tuwenta kayeedekun warage nico igeet ol o Joowo abaaku Kolosiya, igeet o eeginu gɔtɔnɔga giye o atuyu niiga Yesu Kiristo. Nyamer kanyun Jooi ween baatinai igeet deten ki ganɔn.

Kanyeka Jook zany nyariinta

³ Gɔɔn tup kaŋaryonekun naaga igeet, ma kanyeka zany Jook ween baati Manyi ona Yesu Kiristo. ⁴ Eeci kiziikta naaga tuwen o atuyu Yesu Kiristo kibeem reezinet unooŋ areezu ol o Joowo dook. ⁵ Atuwenu niiga, ma areezonu o, eeci baale ɔɔwa e iziiktu niiga kaviyawe o Joowo ɔɔɔ o akati roget o abil been neen o itaŋekun Jooi igeet tammu tadena. Inoko zin tuwen ki reezonet cunooŋ o abilna giye nico. ⁶ Anyaa kaviyawa o Joowo mayuwenet, ma adala looc dook kiyo baale buk akunakun igeet iitene baal aziinun niiga deten o Joowo, ma agayu deten nici een didi e. ⁷ Aziiknu waanice niiga ɔɔɔ nico ɔɔwa ŋaati laŋotinaan o kareeza kazi Epavaras o atiritet niini ageeta vɔlkɔɔnta liŋliŋonte o Kiristo. ⁸ Iiya zin uduwayet niini ageeta ɔɔɔ o akati reezonet o anyun Vɔŋji o Joowo igeet.

⁹ Zin giye nico kajinekun gɔɔn naaga igeet Jook tup nɔkɔ, akana iitene baal kaziikna ɔɔɔ nico e zee been inoko o. Kajina Jook ka kanyun niini igeet genyiz o Vɔŋji o Joowo ka agayi kaal o abon o arooŋekun Jooi igeet utuguz. ¹⁰ Ka zin inimit abaayit baayiz o arɔɔŋ Manyi, ma agoonu kaal ci atalna niini iinya dook. Gole nico ayelzai bonati o baayiz unooŋ kaale o abon agoonu niiga tup, ma iroktanu agaac Jook jurun. ¹¹ Abon bai anyun Jooi igeet ɔyiz ci amezu piryakzet zinzeetine ci alal talniinta. ¹² Nyamer buk anycek niiga Jook ween baatinai zany talniinta giye o anyun niini igeet oromtozek ol ogin dook ka ozolit niiga kibeem nɔɔɔ kaal o itaŋek Jooi ol ogin baliinte onin atobo ki vooritin.

¹³ Eelawet Jooi ageet ɔyize o oŋenu atobo ki muur, ma anyawet niini ageet kivita kɔɔɔ baliinte o ŋeerin Yesu Kiristo o areez niini. ¹⁴ ŋaaten ŋeerin kabaayito naaga yaak, eeci aaryai ageet oŋe ogaac.

Liŋliŋon o Kiristo

¹⁵ Kiristo niinilya ririton ci Joowo. Ayelzaket niini ageet Jook o alaŋ naaga kacin. Niini ŋeerti Joowo ween abuu o abal kaal o eenyca Jooi dook. ¹⁶ Eenyca Jooi kaal o kacin kibeem o alaŋ kacin dook tammu tadena been loota ŋaaten Yesu. Ma kaala nicigi vɔŋizok o anyak ɔyiz kibeem alaŋ ugeec been ɔyiz o baliin uneen. Eenyca Jooi tammu taden ki looc kibeem kaal dook ŋaaten Yesu, ma anyek Jooi nɔɔnɔ kaal nicoko dook ka kabal. ¹⁷ Ma ŋaan keteenyai kaala dook e, aavi niini tɔ laadun, ma arome kaala dook ɔyize onin. ¹⁸ Inoko zin arayin niini ol o atu nɔɔnɔ, ma ol o atu nɔɔnɔ oromte niigi kizi ele codoi. Niigi zin ele ci Kiristo. Nɔɔnɔ neen o anyek nɔɔɔ roget. Niini ŋeerti Joowo ween abuu o avula ŋaazi daayiza ka karawɔi kaal dook niini, ma abal nɔɔɔ dook niini doon. ¹⁹ Eeci arɔɔŋ Jooi nɔɔnɔ kanyak ɔyiz ki diŋdiŋon dook kiyo niini o. ²⁰ Abadake Jooi ele kaal dook ŋaaten ŋeerin Yesu Kiristo. Anyawun niini ganɔn kibeem kaal o eel tammu tadena been loota dook ŋaaten daayiz o ŋeerin keete ween talakec.

²¹ Bar zin baale niiga adeyanu Joowa, ma amarninu nɔɔnɔ, eeci baabanowa ugooc kibeem liŋliŋonok ugooc gerze. ²² Bar zin inoko ŋaaten daayiz o ŋeerin keete ween talakec anyawun Jooi igeet ivita iziti laŋoten been nɔɔnɔ. Ma anyun niini igeet obonta ŋume onin. ²³ Abon zin amenanu niiga aruweku ɔɔ looc kodoyit tuwente unooŋ, ka gerze ŋaan abulunu gi o abon aduyai kaviyawe o Joowo. Nici kaviyak o abon baal gɔɔn aziiknu uuwawonek moden dook loota e neen. Kize zin buk naana gabaren ci kaliŋliŋ liŋliŋon nico.

Liŋliŋon o Pól ole o tuwento

²⁴ Inoko zin naana katalne labak piryakzete onan ŋaaten igeet. Kapirnanɛ naana ele cano o, eeci karoŋ kidica piryakzet baal apirnanɛ Yesu ŋaaten ol o tuwento e. ²⁵ Eŋerawan Jooi aneet kizi gabaren ci ol o tuwento, ma anyan liŋliŋon nico ka kitiritun naana igeet kuwayeyun ɔɔɔ onin kiziiye jurun. ²⁶ Rak baale laadun kinatamma e arɔɔdi Jooi ol o bulok dook ɔɔɔ nico. Bar zin inoko o iya eyelizak niini ol o atu nɔɔnɔ ɔɔɔ nico. ²⁷ Arɔɔdi baale laadun Jooi ol dook ɔɔɔ nico o, eeci arɔɔŋ niini ka kiiya kɔɔɔɔɔ ol ogin atu nɔɔnɔ. Arɔɔŋ niini keyeliza diŋdiŋon ci ɔɔɔ cin baal aroodi noko modeni dook. Ma keŋ ci ɔɔɔ nico o akati gi o aave Yesu ŋaatunooŋ igeet o alaŋ eeginu Juz ka ozolit niiga been nɔɔnɔ titinyon onin. ²⁸ Kuwayeka zin gɔɔn naaga ɔɔɔ o akati Kiristo ol dook, ma kilota nɔɔɔ, ma kademzeka nɔɔɔ kaal o kagaya naaga dook, eeci karoŋnya naaga kanyaaktawa ol dook ŋum o Joowo ka keelit niigi kiyo ol o iroktai ŋaaten Yesu o giye o oromtozɛke niigi nɔɔnɔ. ²⁹ Gi o zin gɔɔn kuukona naana ki liŋliŋon ɔɔɔ o neen, kaliŋliŋ naana ɔyize o adikir anyan Kiristo, ma inoko o aavi alye onan.

2 ¹ Karoŋnyun igeet agaac gi o kuukona naana ki liŋliŋon ɔɔɔ ŋaaten igeet, ki ol o abaak kuture o kazi Ladosiya, been buk ol o ŋaan laadun kicintan niigi aneet. ² Kaliŋliŋ ɔɔɔ o, ka kodoyit igeet dook zinzeeti oromte reezonta. Ka zin agaac niiga dook anyaktu genyiz o anyaa gawiin o Joowo. Ka buk agaac niiga keŋ ci ɔɔɔ ci baal arɔɔ Jooi ziniza o, ma gi nici akati Kiristo ele. ³ Nɔɔnɔ neen ween gɔl o ajowanu niiga gawiin ki genyiz o Joowo dook.

⁴ Kayeedekun gi nico o, ka kɔkɔm eet ci aku alabanun igeet daŋonte ceen vɔlɔŋ akom leeminet. ⁵ Inoko zin kadewo naaga eleetine doon, maje baabaninta karome naana ki igeet, ma katalne giye o adowinu niiga tup, ma aruweku ɔɔ looc tuwenta ŋaaten Kiristo.

Azimnyai rogeti ŋaaten Kiristo

⁶ Mazin giye o agamtayu niiga Yesu Kiristo kizi Manyi cunooŋ, abon aromoneku niiga nɔɔnɔ baayiz unooŋ. ⁷ Uruktek ɔɔ looc ŋaaten Yesu ka itirokcai ŋaaten nɔɔnɔ. Emeda odoyit tuwente unooŋ ɔɔɔ ebaal edemeztu laadun e. Anycek Jook zany tup nɔkɔ.

⁸ Karicanekun igeet, ebeyit eleeti jurun, ka kɔkɔm eet ci alabanun igeet genyize ci areket keŋ akati demziin o volonjo aku ole o deer. Eeci demziin nici akati keeranɛ o loocu, alaŋ akati Yesu Kiristo. ⁹ Ma bonati o baayiz o Joowo dook ayelzai ŋaati Kiristo. Abitiz Jooi nɔɔnɔ bonata, ki genyiza, been ɔyize onin dook. ¹⁰ Anyozeyun zin buk igeet bonati o baayiz o Joowo dook giye o oromtozɛku niiga Kiristo, ma abitizun niini igeet calaŋ arooŋnyu bodo gi oma. Anyak niini ɔyiz ci abali kaal o anyak ɔyiz dook.

¹¹ Ma giye o oromtozeku niiga Kiristo, eeltu niiga kiyo ateedinu o. Bar zin teedinet cunoon o alañ atobo kibeen o goon agoon ol o deer azeene. Ma naaga nyaaten Kiristo keel kiyo kateedi o giye o wogayet niini ageet dooyize o oñe o aroonket ageet eleeti ogaac kutuguz. ¹² Waanbaal oonyinu e, eeltu niiga kiyo adaaktu kibeen Yesu o, ma buk onyente nice eeltu kiyo añaanu niiga daayiza kibeen nōōn o, eeci atuyu niiga dooyiz o Joowo baal añaani Yesu daayiza e. ¹³ Baale eelnu niiga kiyo ol o adaai o, eeci waanice eeginu moden ci oñenu, ma akōmnūñ igeet lotinok zinzeetine ugooc. Bar zin inoko o anyayūñ Jooi igeet roget nyaaten Kiristo. Aarawet Jooi ageet oñe ogaac dook. ¹⁴ Aara niini nyaatinai ŋabolet o oñenu kibeen dooyiz o lotinowu baal gōon aconanet e iitene baal adodine Yesu Kiristo keete ween talakec e. ¹⁵ Ma gole nico izirziran Jooi dooyiz o Loryento ki kaal o anyak dooyizok dook been alaazet uneer. Ma ayelza niini dooyiz onin amōgi nōōgo talakece o adañni Yesu nyaati awōyi caala.

¹⁶ Karicanekūñ zin naana igeet ka calañ anyeku eet oma kabakbayanun giye ci akati dayiin, karabōñ een kaal ci awudu, karabōñ een gi ci akati iiten o Juz kazi Sabit, karabōñ bar een diñdiñani ci adiñdiñanu nyelok iitene o gōon anyerkin. ¹⁷ Eeci kaala nicigi dook riritōñ ci kaal ci ka kivita, bar zin gi nici akati Yesu Kiristo e. ¹⁸ Má anyeku eet oma kabakbayanūñ igeet gole ci aduwakūñ niini igeet wunozyak cigin ka idiñdiñanti niiga toonnyak o Joowo kiyo niini o. Eeci eeti ci abil nōko adōñ niini e. ¹⁹ Ma eeti ci agōon nōko edeyai niini nyaati Kiristo ween wō o bor o ol o atu nōōn dook. Bar zin nyaaten Kiristo ween wō o bor o tuwento, aromē ol o tuwento dook kodoye kiyo korōna o arom e. ²⁰ Ma iroktai niigi kodoyit eo arōñi Jooi.

²⁰⁻²¹ Mā didi oromtozeyu niiga Kiristo daayize onin, ma alaŋaan aziiknu kaalyan ci loocu noko, naa zin bodo abaaku baayiz ci ol ci loocu o? Izitu koca tarbale mā aziiknu keerit o azi ne, “Má agam gi nico. Má atar gi co. Má uum ce.” ²² Ma kaala nicigi dook kaal ci utuguze, ma akōm ŋinti akati. Olla niigi keeranē ci avu eete ci deer doon. ²³ Ŋedet keerita nicigi mā kacin bar kizik anyak genyiz ceen didi giye o adañke niigi ol kidiñdiñanit toonnyak o Joowo, ma acelbezan eleeti, ma apirnanē eleeti. Bar zin mā aada ele gi ci aada, alañ kaala nicigi atiritet ageet kuzuuti eleeti kaale o ger.

Baayiz o reen been o colai

3 ¹ Agayu niiga oromtozeyu Kiristo, ma itingazu been nōōn daayize o anyaa oñe ugooc. Abon zin areku zinzeeti kaal o eel tammu tadena ŋaao aave Kiristo libire o Joowo azo. ² Aryek zinzeeti kaal o eel tammu tadena. Otonit kaal o arōñ ol o loocu. ³ Eeci utuñtu niiga oñe kiyo eeti o adaai alañ bodo agōon oñe o. Inoko zin roget unoon colai anyak Kiristo ŋume o Joowo. ⁴ Kiristo neen o anyūñ igeet roget ween didi. Mazi katin ayelzai niini, ayelizyanu buk niiga, ma aromoneku nōōn, ma azolu kibeen nōōn titinyōñ onin.

⁵ Abon zin adaweku looknya kōot many kaalyan o loocu ger gōon arōñ eleeti ugooc utuguz kiyo zoocmazita, ki waanzet, been kaal o ger akati waazet, ricik oñe zinzeeti appinzet o atobo ki diñdiñani o joowanē o loocu. ⁶ Eeci kaale nicoko akunak iima bornet nōñ o Joowo been payiin onin ol o alañ azi nōōn. ⁷ Baale rak niiga alya agoonu kaal nicoko waanbaal ŋaan abaaku muura e.

⁸ Bar zin inoko o abon adaweku kaal nicoko dook look kōot many kiyo bornet nōñ, ki zinzeeti gidanjin, ki corzōñ, ki ŋōmtōñ, been utugeti cañkawōñ. ⁹ Buk mā avolonnyu, eeci utuñtu niiga zinzeeti o reen been gerzitin uneer. ¹⁰ Anyaktu zin inoko niiga zinzeeti ci colai, ma azaacekūñ Jooi igeet baayiz ci abon tup ka agaac nōōn juruñ, ka zin buk obonta niiga kiyo niini o. ¹¹ Enico akōma ŋorōwōnet ci ol o Juz kibeen moden oogi. Ma akōm buk ŋorōwōnet ci ol ci ateedi been ol calañ ateedi. Ma akōm eet ci titiny been eet calañ titiny. Ma buk akōm ŋorōwōnet ci ol ceen gabara been ol calañ een gabara. Bar zin adiñdiñ kaale dook Kiristo doon, ma aavi niini ola dook been kaale dook.

¹² Inoko zin igeet eñerawūñ Jooi iziti ol cigin, ma areezūñ niini igeet. Abon zin awucnekūñ igeet ol ogen. Abon eeginu gonone. Abon acelbezanu eleeti. Abon atibezenu. Abon anyaku zinzeeti laliz. ¹³ Itirito niiga dook. Mā anyak eeti zōz ci miliny gone oman, abon oñe niini nōōn kiyo buk oñe Yesu oñe ugooc o. ¹⁴ Mazin kaale nicoko dook titiny oñe reezōnet, eeci reezōnet arom kaal dook kodoye.

¹⁵ Abon ganōni o anyek Kiristo ol o atu nōōn abal zinzeeti ugooc, eeci otowawūñ Jooi igeet dook nyaatodoi ka anyayit ganōn nico. ¹⁶ Abon zōz o Kiristo abaak zinzeetine ugooc oñe. Edemeztō. Itilozō niiga many genyize unoon dook. Ebenit beniinok o kadiñdiñani Jook gole ween didi anyeck Jook zany beniinowe zinzeetine ugooc dook.

¹⁷ Utuguz kaal ci agoonu been ci aduwanu dook zaare o Manyi Yesu. Anyeck Jook ween baatinai zany kaale dook nyaaten Yesu.

Lotinet ci tatok o atu Yesu

¹⁸ Niiga ŋaai iziiyit eet ugooc, eeci nici gi o abon agoonu neen giye o atuyu niiga Manyi Yesu. ¹⁹ Buk niiga eeta ereezit ŋaai ugooc. Má agidu nōōgo. ²⁰ Ma niiga dōlya iziiyit baatugoooc ki yaatugoooc kaale dook, eeci gi nici anyek Jook katalō. ²¹ Buk niiga baatizet má agernyeku dōl ugooc bolŋaca, gerze ŋaan barañe dōl zinzeeti.

²² Ma niiga gabara abon aziñnu manyigi ugooc aliñliñoneku loota ŋina kaale dook. Má bar olla aliñliñoneku nōōgo juruñ nyaati acinūñ niigi igeet doon giye ci aroonnyu zoocok ci abon ola. Bar aliñliñtozek nōōgo zinzeetine ceen didi giye o aŋolinu niiga Manyi Jook. ²³ Ma kaal o agooneku manyigi ugoocok dook, utuguz volkoconte o zinzeeti ugooc dook, kiyo aliñliñoneku Jook o. ²⁴ Eeci agayu niiga ŋaan aruwekūñ Manyi Jooi igeet wōyit o aterkedek niini ol ogin giye o aliñliñoneku niiga Manyi Yesu Kiristo. ²⁵ Ma ol o agōon kaal o ger nyaatunoon dook, ŋaan katin acacai kaal ci gerze gōon agōon niigi o, eeci Jooi apak ol dook kotobto.

Ijinit Jook iinya dook

4 ¹ Ma niiga manyigi gabara, abon agoonu gabara ugooc juruñ, eeci agayu buk anyaku niiga kibeen nōōgo Manyi unoon igeet dook tammu tadena.

² Emeda ijinit Jook oñe. Aryek zinzeeti ŋaryiin juruñ. Anyeck Jook zany ŋaryiinta. ³ Buk ijinteyetu ageeta Jook ka kōkolayet Jooi gōl ci kuuwaka zōz onin ka kuduktaya ol zōz o Yesu Kiristo baal rak aroodi e. Nicini zin gi o gōon kacabine naana neen.

⁴ Ijinteyay zin Jook ka kuuwayek ol zōz nico kiziiye juruñ gole o aroonkan niini aneet.

⁵ Egenyit gōon nyaati aromenu kibeen ol o alañ atuwe. Ma gōon te ajowanu wañi, ooritnōñ uduktak nōōgo zōz o akati Yesu Kiristo. ⁶ Anyeck zoocok cugoooc o kizi zoocok ci atalna ol, ma amednek nōōgo tup nōko. Abon agayu niiga gōl ci abarzeku ol dook zōz ci aleemnyai.

Zoosok o Pól aṭorneke

⁷Inoko zin kitoonekuṅ igeet Ticikos ween gɔtɔna o kareez naana nɔɔnɔ tuwenta ka kook kuduwayuṅ niini igeet kaal o agoononeket ageeta ṅaato been buk kaal o kagoona naaga dook. Ticikos niini gabaren ci aliṅliṅ vɔlkɔɔnta, ma keegin naaga dook been nɔɔnɔ gabara ci korkorya liṅliṅjonte o Joowo. ⁸Karooṅ zin naana nɔɔnɔ kook kicinuṅ igeet ka kanyuṅ igeet atalɔ zinzeetine ugooc ṅaati aziṅṅu kaviyak ogaacak. ⁹Kitoonekuṅ nɔɔnɔ been Onesimos o gɔɔn avɔlkɔɔc ween gɔtɔna ona kareez, ma buk een niini logo unooṅ kuturo. ṅaan zin avɔ aduwakuṅ niigi igeet kaal dook o akanet ageeta ṅaato.

¹⁰Ajinanuṅ zin igeet Aristarkos o kacabina naana ki nɔɔnɔ ṅaato. Buk azaayuṅ Marko ween ṅeerti aziiti Barnabas. Iiten baale kuduwayuṅ igeet ka atalta nɔɔnɔ, ma akunakuṅ niini igeet ṅinaante. ¹¹Azaayuṅ buk Jasuwa o kazi zaar oogi ne Justus. Mazin ɔl ci Juz een iyu azaayuṅ noko, ɔl ci atu Yesu ole o Juz dook neen. Ma gɔɔn atiritan niigi aneet ṅaati uwayi kaviyak o akati baliin o Joowo. Katalne gɔɔn naana ṅaatineṅ ɔɔɔt.

¹²Ajinanuṅ Epavaras ween buk niini logo unooṅ kuturo, ma een gabaren o Yesu Kiristo. Ajinekuṅ gɔɔn niini igeet Jook ɔɔɔt ele tup nɔkɔ. Anaryonekuṅ niini igeet ka eelit tɔp anyayit tuwen ci adɔi ka utuguz kaal o aroṅekuṅ Jooi igeet utuguz. ¹³Kaga didi naanalya nɔɔnɔ. Aliṅliṅ gɔɔn niini ɔɔɔt ele ṅaaten igeet been ɔl o atuwe abaa kuture o kazi Ladosiya been buk ɔl o abaa kuture o kazi Irapolis. ¹⁴Ajinanuṅ buk Luka ween akim o agɔɔn kareez naaga. Azaayuṅ buk Demas.

¹⁵Ijintayetu zin buk niiga dɔl o yaatigaac tuwento kuture o kazi Ladosiya, ki ṅaa o kazi Neva, been ɔl o tuwento gɔɔn arumo ceeze onin. ¹⁶Ma ekeebtu warage nico niiga dook, itoontek buk ɔl o tuwento abaa kuture o kazi Ladosiya ka kekeebit bodo niigi. Karooṅnyuṅ zin buk naana igeet ekeebit warage o kitooni ɔl o tuwento abaa Ladosiya. ¹⁷Enektek Arcipos ne, “Abon adica liṅliṅɔn o anyin Manyi ineet.”

¹⁸Zaawinet nico kayeedekuṅ igeet naana Pól aziite onan ele. Má anyeku zin kibiirtuṅ igeet ooti cabiinte onan. Nyamer deteni o Joowo oromte been igeet.